

本 報 日 記

● ● ● ●

客
杭
日
記

郭
昇
撰

中
華
書
局

叢書集成初編

御試備官日記（及其他三種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

客杭日記

此據知不足齋叢
書本排印初編各
叢書僅有此本

雍正乙巳春三月六日客揚州。飲于程松門七芙蓉閣。同會者爲里中友江硯南、酒半、松門兄子岷東出觀所藏元京口郭天錫先生日記真蹟。共四冊。行楷精妙。奕奕有神。中有至大戊申客杭一冊。時燭邊醉眼觀之。不甚記憶。後十餘日。耿耿于胸。因亟從史硯南借鈔。硯南亦有同好。卽往言之。岷東殊不秘也。攜至予寓舍。呼燈捉筆。寫成草本。略汰其無繫武林典要者。細讀之。則杭之舊蹟大半皆在。往還而坊陌橋道。琳宮梵宇。去宋不遠。壯麗深嚴。可想見焉。遊鳳凰山故宮一段。載白塔以碑石爲基。猶有進士題名金銅鐘一口。上有淳熙改元曾純甫觀篆銘。則他書俱未載。此信乎百聞不如一見也。寺壁題詩。與程史所紀康伯可題徽廟御畫扇。略有數字不同。想是後人所改耳。先生去今三百餘年。偶然撥筆。完好無恙。而適遇予兩人皆杭人。鈔而傳之。似乎有待者。若岷東不憚希世之藏。公之于人。使後之述風土者有所致。皆不可以不記也。三月廿六日。杭東城磨鷄。

客杭日記

元 京口郭 昇天錫撰

至大戊申九月初一日燒壽星紙拜親路遇雲公顯舍人握手話去年此日在邳州道中時相與一笑初三日雨陳和父來錄示新文小窗兀坐誦滿城風雨近重陽之句誰其慰予岑寂耶初六日晴李仲謙攜紙求書畫蘭過五條街遇陳景南同訪陳響林出示小米手幅軸臨李伯時馬雪林行虎三卷塔海公物也

初十日晴登甘露寺見本長老畱酒午麪仍求書放翁水調歌孫楚望摸魚子二詞于多景樓下壁上又以紙求書遺教經四十二章經瀉山警策證道歌

十二日晴爲甘露本無傳長老鈔經客有惠杭州潘又新筆者書小楷數千而不伐可愛可愛

十四日晴訪盛季高出示李重光墨竹鷓鴣希遠墨梅古木房明仲同茶

九月十六日晴晚赴呂城夜航作錢唐之行

十七日午前抵呂城壩下倒換小舟至奔牛復換小舟晡時至常州入城元豐橋見白湛淵提舉值出江陰未回乃子无咎无華畱飲同白无咎到太平寺觀壁上畫水中作一筆繞之不斷立視久之若洶湧生動之意奇筆也

十八日晴同无咎回蔡德甫禮畱小酌煮鱖蒸芋次别无咎昆仲登夜航之姑蘇有北客喧呼至二更乃

睡。

十九日午後抵平江。見龔子敬山長父子。畱宿具晚飯。飯已。畱燈夜話。是夕多蚊。

二十日晴。飯罷登航。解后。杭人潘伯起呼酒酌之。蓋在大都時曾相識故也。共上船行。

廿一日。晡時上長安買飯。

廿二日。四更到杭州城外。霜月滿天。寒氣逼人。候北關門接待寺鐘動。換舟入城。拂明潘伯起送予。歇于施水坊橋梳頭。沈待詔之樓。遇金壇尹子源同寓。橋東訪趙伯可。儲叔儀到江浙省中照磨所。見李叔義。省西見張菊存。下龔子敬書。會張松澗府判同茂之。到長生老人橋。過紀家橋解庫門首。見吳若遺提點。至大元年戊申九月廿三日。客杭晴。早過井亭橋。解后。張雲心府判。次遇湯北村同知。張景芳學正。到玄同觀。見吳若遺。若遺有他事。令師孫羅康伯相接。其早飯鄭表白同集栢窗鄭君之子也。飯已。入壺中林壑。次開北斗殿。看李息齋所畫松二株于壁間。見李伯玉改所幹之文。約來日于省中見其子。出北關門。湖州市妙行寺中尋伏維那。已于昨日登天目山矣。徒有悵快寺僧宗兄供紙畱數字而退。觀正殿佛三尊。偉甚。中設毗盧遮那佛像。殿前止有藏一座。次入法堂。有碑石數本。云喻彌陀神筆所畫佛像。傍刻本末不暇記也。次禮古觀音像。相傳唐朝塑者。兩邊畫壁以屋暗不可細覽。門有放生池。俗云接待寺者。卽此院也。回路足行倦甚。坐小舟而還。趙伯可來寓樓頗潔。便于坐臥。大抵杭城樓居相連。自有一種風韻。耳。婺州孔君立來。聞孔提舉新除。晚見唐仲文外郎。出示米老研山圖。

九月廿四日。客杭。晴。早到省中。照磨所見李叔義。改抹元文。到儒學提舉司。攜李兄書。見王一初都目。投呈子會王壽之。王子芳。任伯和。是日分付該吏金君玉承行。次約金君玉。毛令史。市樓小集。雨作。湖上兜率寺見趙子昂學士不遇。乃姪趙仲美。具茶訖。致意。

廿五日陰。客杭。尹子源約小飲。是夜客樓喧甚。必雨作也。

廿六日陰。客杭。結縛橋西前洋街。回謁湯北村。同出訪張晴川。次見崔進之。同北村。具酒午麪。浼書數紙。屏藉高彥敬古松一株。可愛。窗外矮橘數樹。結子無數。壓枝欲折。若吾鄉則無此也。飲散由大街轉歸。張菊存來。吳茂之來。值出。今日見北村說。葛元白。曹梅南。戴祖禹。金子仁。胡穆仲。皆爲古人。可惜。再到杭城。愈覺舊游之落落也。

九月廿七日陰。寓杭。早到省中。見李叔義。次到儒司。見周都目。以官吏未允所請。歸家寫狀。再到省中。見張德輝。德輝約晚來說話。是日于省卷中檢尋學錄解由方見。晚晴登吳山下。視杭城烟瓦鱗鱗。莫辨處所。左顧西湖。右俯浙江。望故宮蒼莽。獨見白塔屹立耳。次謁伍子胥廟。轉至拱北樓。卽朝天門。行大街官巷而歸。茅山書院山長亦盞象賢。金壇教諭王竹所來。茶罷。同見趙伯可。尹子源相過夜話。

廿八日晴。客杭。鄉人吳君用來。訪湯北村。訪吾子行。出所作無稽集。皆戲談也。玄同觀見趙子昂時。郝左丞坐正席。子昂問都下事。遊開元宮。舊楊駙馬宮也。深遂可愛。正殿曰景命。萬年之殿。晚見張德輝。看省卷。又作學錄。教諭擬倒矣。託其宛轉。未知可行否。浼人幹事。不料其相誤也。

廿九日客杭晴早到省中見張德輝李叔義訪王成之不過再到省中禮房爲立擬劄事到儒司司官不出獨吏輩兀坐司房而已訪張竹村書樓觀諸公詩牌湯君白來同遊昭慶寺看新塑佛像次入廣化院次遊仙林寺寺中無可觀者相近一術士之女談星說命若懸水然次與君白午飯君白具茶茶已自觀橋行至官巷而歸

三十日陰客杭早到省中禮房見張德輝李叔義是日改正擬劄同君白出遊宗陽宮時裝塑未就次遊新宮佑聖觀看擁壁二十四堵皆新畫也路遇胡石塘主簿煎魚沽酒會尹子源沈六郎晚見德輝約來日省中計會選本晚雨暄甚夜雨生寒大德十一年二月十七日禮房呈前鎮江路儒學學錄郭畧給由稟奉省堂鈞旨連送還房于學正山長內任用者至大元年戊申十月初一日雨客杭城施水坊橋東岸沈氏樓

初二日雨終日客杭到省中付文書與選房以未照元除又欲刁蹬張德輝宛轉言之到儒司大雨中止有武老兀坐廳上諸吏無來者湯君白李君德來算範圍數次同到官巷問茶茶已訪周君遠道士次到君德家出子固墨戲間看看已分路各歸

初三日又雨客杭到省中見李叔義伺候也先伯提控不出同尹子源見儲叔儀酌小酌次同叔儀到子源寓樓開尊薦亥首德清吳菊泉相遇夜話子源同問茶吳公至元廿七年赴北寫金字經者

初四日乍晴燒玄壇紙宗壽卿來言來日有人歸鎮江付家書

初五日陰午同小王覓舟到北新橋覓方仲明不見空費船錢一貫二百五十大雨只得急回到龍舌頭

西去漾沙坑。見馬從簡外郎言。乃事未允所請。回見德輝。言來日當爲著語不必出也。付後司使用。吳菊泉見過夜話。

初六日雨。不可出。寓杭。儲叔儀隔河樓上見呼。出紙索書。具酒晚飯。

初七日雨。客杭。李君德湯君白來。攜紙索書。就送紙一幅。訪吾子行求篆字。閒語久之。惠印色。方路遇胡石塘。

至大元年。十月初八日雨。客杭。見張德輝于省中。遊淨慈寺。禮寺看羅漢五百尊。訪朱敬齋。

初九日喜晴。客杭。早見鄭鵬南廉訪。次會柯以善。以善留三酌。劉悅心張景芳寫篆字。王秀才續至。王杭人。吾子行之高弟也。訪吾子行不遇。儲叔儀以今日登舟還義興。相呼午飯。出紙求字。尹子源請薦海蜇。話至二鼓。

初十日陰。早見鄭鵬南廉訪。見柯以善。到省中。盛親家見。借鈔一笏。以今日歸。不及作別。晚到省中。伺候吏輩。到新宮橋。見井同知。浼于郭都事處著語。

十一日又雨。溼熱。早湯北村招早食。坐客方仲明。宋興之父子。次同方舅到。下馬鑿巷。見李君實。新授宜興都目。茶罷。拉往新門。具麪。晚見馬公。猶未慨然。次見德輝。急步而回。汗流溼衣。幹事未成。殊焦煩也。

十二日客杭。朝天門訪張雲心州判。畱坐。具午酌。薦糖蠍雞麪。雨作。取傘乃回。

十三日雨。客杭。張景芳送紙。求書。吳興虛徹道人詩偈。道人費氏景芳之曾祖母云。遣王二到湖州幹事。

作趙文卿陳有之書

十五日客杭城施水坊橋沈六郎樓先妣憫忌日

十六日又雨客杭張雲心遣僕寄書來雨中約相過彼此客況蕭索耳到省中伺候吏輩

十七日晴客杭王二自湖州回路遇賈景顥紀祥甫周謙甫鄰樓尹子源得財賦府文書了辨可喜予滯

留日久所幹未就愈覺憂悶耳晚尹子源燒紙招夜飲坐客余及沈及之沈國寶沈六郎父子

十八日晴客杭早到開元宮見王眉叟提點不遇徒弟徐雲谷相接到小偃門回謁張仲美知事不遇是

日遊大般若寺寺在鳳凰山之左即舊宮地也地勢高下不可辨其處所次觀楊總統所建西番佛塔突

兀二十丈餘下以碑石整之有先朝進士題名并故宮諸樣花石亦有鐫刻龍鳳者皆亂砌在地山峻風

寒不欲細看而下次遊萬壽尊勝塔寺亦楊其姓者所建正殿佛皆西番形像赤體侍立雖用金裝無自

然意門立四青石柱鐫鑿盤龍甚精緻上猶有金銅鐘一口上鑄淳熙改元會觀篆字銘在皆故物也行

至左廊記得壁上一詩云玉輦成塵事已空惟餘草木對春風憑高□□□□目斷蒼梧夕照中寺門

俗云望江亭俯視錢唐江水大略與揚子江同但隔岸越山蒼翠差勝耳遠見西興渡口烟樹如薺次遊

新建報國寺行至殿後有塊石僅畝二十餘字僧子別立一木牌云五十年前理宗夢二老僧曰後二十

年乞一住足地恍然夢覺今築地得此石却無年代可攷昔錢剎而爲王宮今茲復爲錢剎如波入海以

予觀之亦好事者爲之也且朝代之廢興皆天也二僧入君王夢中孰記而傳之耶浮屠之說妄矣傍有

二客相與一笑而回。

十九日晴。客杭三橋早飯。飯已。見吾子行寫篆字相送。仍取玉簫爲子吹數闋。子行隱居不仕。時能道滑稽語。亦近來罕有。再到省中。乃事少見次第。

二十日晴。客杭登吳山城隍廟壁畫二鬼。頗得。回立門首。左顧西湖。右觀大江。杭郡人家。皆在足下。次遊玄妙觀。門立徽宗御書碑石。殿前立高宗御書道德經。石刻經幢二。亭覆之。後有真武觀記。開平二年物也。有老道士云。吳越時已有之。昔爲紫極宮。惜前朝碑石有天慶觀字。皆鑿去不存。殊失古意。且朝代更改。勅額曰玄妙。當存其已往。而新其方來。可也。道士俗物。大敗人意。回到省中。石路高下。足力少倦。

廿一日晴。客杭湯秋巖來。邀飲紅酒。次送秋巖至蘭陵坊分路。方仲明寄紙求書畫。情緒不佳。遲一二日下筆。燒玄壇香。囑告乃事。

廿二日晴。客杭湯君白來。同到府學。見李霽峰教授。次見張晴川。次見湯北村。會韓竹間。晚遇毛海雲。山長晚香。

廿三日晴。霧。客杭早冒霧到馬婆巷。見季君實。託馬惟良。見張士瞻說話。到寶祐坊佑聖觀橋西。回謁胡則大。不遇。

廿四日陰。客杭湯北村。費渙夫來。費公鄉人也。年六十三。

廿五日晴。客杭早到省中。架閣庫幹事。未就而回。遇蘇淳齋。杭之號醫者也。約市肆小飲。

廿六日。客杭。早重霧。早見唐仲文不遇。爲長興欠俸。囑呈文催討。盛親家公自長安來。同西盛壽一哥。及二鄉人相訪。盛親家公約到芳潤橋午麪。壽一哥同集。

廿七日。客杭。到省中。伺候書卷已完。馬生改抹。但咨省而已。晚見馬生云。非不用力。首領官不從奈何。願退元物。不會收。歸家悶甚。奔走兩月。今日壞盡。

廿八日。晚燈下坐久。謀之無計。更遲二日。且往長興索俸作歸耳。

三十日。晴。冷。湯君白知予事不如意。呼舟過湖。閒行散悶。遊南山。惠因華嚴寺。次遊開化院。次遊石屋洞。深暗不可測。覺陰氣逼人。壁上記姓名而回。入勝果尼寺。君白令親惟德母子爲尼。延坐設茗。罷。次遊水樂洞。扣寺門。久之乃得入。遠寺皆奇石。有亭扁曰聲在寺。後字。一泉滴洞中相應。鏗然有聲。故名。亭有石刻。坡翁東陽水樂亭詩。觀畢而下。踏石上黃葉。扳逕邊古松。山林間自有一種清氣。借筆題云。至大元年十月卅日。京口郭天錫同湯君白來此聽泉。寺僧具茶。飲之清甘。卽此水也。更過一二僧寺。以心緒不佳。不及詳記。泛湖而還。西北風起。同君白錢唐門小酌分路。

至大元年戊申十一月初一日。

初二日。晴。客杭。到省中。領文書。取回甘結。同子長見吾子行就別。次別湯北村。晚見馬生。了結乃事。晚邀子長小酌。囑照元除事。別李叔義。

初三日。早別張德輝。同沈六郎買人事。

初四日晴。離杭州。唐涇晚飯。夜行。

附載

至大戊申十一月十五日。客長興。訪欽察公。出宣和御府黃居案雪雀圖。用雙幅絹畫。角上添金龍。長可六七寸。圍葫蘆御書。并內府圖書二印。雪樹數株。凍雀上下。下復作二鵲。眞奇物也。

十一月廿四日己卯。陳元善來約文卿及子到其家。觀蘇漢臣孩兒四軸。其酒三酌。三十日冬至節。客長興。同沈孤峰、陳監鎮、袁正甫、盧希顏、沈希古、賀呂知州三酌。諸公去後。呂侯獨留。予看許道寧溪山漁樂圖。上用宣和殿寶。後有伯幾仲賓子昂三公題。李君章物也。

閏十一月十三日。客長興。訪說雲心。出示黃居案萱草湖石蜺貓二軸。蔡月卿物也。黃氏父子作石。用筆橫拖。小作圈子。俗謂之野鶴翅。

至大元年戊申閏十一月十五日。五更束裝賦歸。早離長興。午過呂山下。松竹蒼翠。前一橋曰甫里橋。人言是陸天隨隱處。詩家醞藉。猶可想像也。

至大二年己酉二月初九日。趙伯可相約早飯。飯已發書。請伏虎林首座。引領作焦山之行。虎林聞呼。卽至。是日春色佳麗。江靜無風。到山見謙巽中維那。次入方丈。見尊無能長老。啜茶。茶已。領入具酒煮麪。坐者予及趙伯可。二僧司官。伏首座。登山之頂。看塔。展目眺望。次憇于飛仙亭。回見雅淡雲首座。巽中煎魚具酒小集。酒盡。伯可先睡。度不可回。先遣諸僕渡江。晚陪尊長老虎林。淡雲到海門邊看日落。一瞬萬頃。

金波蕩搖。可謂奇觀。散步而回。尊老既別。仍送酒果。到淡雲房小酌。次拉虎林。巽中踏月上羅漢巖坊。福東濟禪房。佛燈熒然。爐香未過。其茗果閒話。俯視棲鶴危巢。皆在窗下。與二僧月下聽江聲。倚樹清論。久之。一洗城市之塵俗也。夜宿巽中房。虎杯共榻。

鷄按天錫有詩云。鷄子江頭風浪平。焦山寺裏晚鐘鳴。爐香未斷燈花落。喚起山僧看月明。妙甚。即此時作也。

郭髯行記。篋中收便是滄江虹月舟。解道樓居好風韻。杭人不合異鄉遊。
題郭雲山日記真蹟一絕句。樊榭山民厲鶚書。時雍正三年四月六日。

客杭日記刻成小詩代跋

多情合遣到杭州。錦字私箋客裏愁。卻羨雨窗饒樂事。一尊相喚隔河樓。

樊榭風流嬈往賢。雲山墨妙手親傳。錦囊湘篋同珍重。記取從今五百年。

予傳樊榭先生手鈔本開雕

尊前歡賞惜匆匆。彈指誰畱石火踪。

謂七芙蓉閣燕集諸先輩

展放烟雲重過眼。可堪還問七芙蓉。

事詳鳳序

玉躔金題走蠹魚。都來有願米顛如。巾箱乞與新開本。津逮人人足祕書。

乾隆壬辰六月朔日題時

虎林烟瓦屋鱗鱗。客裏光陰只四旬。但說樓居風韻好。夜來聽雨卻愁人。

十日都來五日陰。湖山勝槩亦登臨。金鐘白塔前朝話。別有詩情無限深。

小劫人間五百年。坊橋寺觀半灰烟。往時耆舊風流盡。并藉珠囊一例傳。

徵君樊榭畢世事蒐羅。帳篋如斯苦不多。未許清言獨珍祕。郭髯其奈鮑髯何。

錢唐魏之琇同作